

# Huet

## I.

Les oisillons de mon país  
Ai oïz en Bretagne;  
A lor chant m'est il bien a vis  
Qu'en la douce Champagne  
Les oï jadis,  
Se n'i ai mespris.  
Il m'ont en si dous penser mis  
Qu'a chançon faire me sui pris  
Tant que je parataigne  
Ce qu'Amours m'a lonc tens promis.

## II.

De longue atente m'esbahis  
Sanz ce que je m'en plaingne;  
Ce me tout le gieu et le ris;  
Nus cui amours destraigne  
N'est d'el ententis.  
Mon cors et mon vis  
Trais si mainte foiz entrepris  
Qu'un fol semblant i ai apris.  
Ki qu'en amor mespraingne,  
Ainc, certes, plus ne li mesfis.

## III.

En besant mon cuer me ravi  
Ma douce dame gente;  
Trop fu fous quant il me guerpi  
Pour li qui me tormente!  
Las! ains nel senti,  
Quant de moi parti;  
Tant doucement le me toli  
Qu'en sospirant le trest a li;  
Mon fol cuer atalente,  
Mais ja n'avra de moi merci.

## IV.

D'un beser dont me membre si,  
M'est avis, en m'entente,  
Qu'il n'est hore, ce m'a traï,  
Qu'a mes levres nel sente.  
Quant elle souffri

Ce que je la vi,  
De ma mort que ne me gari!  
Elle set bien que je m'oci  
En ceste longe atente,  
Dont j'ai le vis taint et pali.

V.

Puis que me tout rire et juer  
Et fet morir d'envie,  
Trop souvent me fet comparer  
Amours sa compeignie.  
Las! n'i os aler,  
Car pour fol sembler  
Me font cil faus proiant d'amer.  
Morz sui quant jes i voi parler;  
Que point de trecherie  
Ne puet nus d'eus en li trouver.

(Autre rédaction)

III.

Ainc vers Amour rien ne forfis;  
Ja de moi ne se plaigne;  
Einçois por li servir nasqui,  
Coment ke me destraigne.  
Par un tres dous ris  
Sui de joie espris,  
Que, se j'ere rois de Paris  
Ou sire d'Alemaigne,  
N'avroie tant de mes delis,  
Qu'Amours me fet cuider touz dis.

IV

Bien doit estre liés et jolis  
Cui Amours tant adaigne  
Que il se truist loials amis,  
Et qu'a amer l'apraigne.  
Ne doit estre eschis,  
Mais adès sougis,  
A celi cui proie mercis;  
Puis que son cuer a en li mis,  
Sanz partir s'i ataigne  
Pour estre de joie plus fis.

- letto 348 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/huet-31>